

武經總要

二十

詳校官中書臣閔思毅

編修臣倉聖脈覆勘

總校官知縣臣繆琪

校對官中書臣高中

謄錄監生臣趙希濬

欽定四庫全書

武經總要後集卷十

宋 曾公亮等 撰

故事十

兵貴有繼

兵無繼必敗附

兵多宜分軍相繼

救兵

力少分兵必敗

分兵勢破之

上速

示緩

攻敵有緩急附

示弱

示彊

示閑暇

設詐誤敵

此條正文闕

素教

素備

先設備取勝

戒不備附

兵貴有繼

後漢初張步據齊地十二郡漢將耿弇討之壁於臨淄

步與弟三監弘壽及大彤渠師重異等兵

重姓異名也

號二十萬屯臨淄大城東將攻弇弇先出淄水上

與重異遇突騎欲縱擊弇恐挫其鋒令步不敢進

故示弱以驕其氣乃引歸水城陳兵於內步氣盛
直攻弇營與弇裨將劉歆等合戰弇升王宮懷臺
臨淄本齊國所都即齊王宮中
之懷臺也東觀記作環臺云視歆等鋒交乃自
引精兵以橫突步戰於東城下大破之

呂布從東緡與陳宮將萬餘人又來與曹操戰時曹操兵
皆出取麥不能以千人屯營不固曹操乃令婦人守
陴悉將兵拒之屯西有大堤其南林木幽深布疑有
伏兵乃相謂曰曹操多詐勿入伏中引軍南七十餘

里明日復來曹操隱兵堤裏出半兵堤外布蓋進
乃令輕兵挑戰既合伏兵乘堤步騎並進大敗之
魏大將軍曹休從皖口深入與將賈逵度吳無東關之
備必併軍於皖乃部署諸將水陸並進行三百里
聞休戰敗孫權遣兵斷夾石諸將不知所出或欲
待後軍逵曰休軍敗於外路絕於內進不能戰退
不能還安危之機不及終日賊以軍無後繼故至
此合疾進出其不意所謂先人以奪其心賊見吾

兵必走若待後軍賊已斷險兵多何益乃兼道進
軍多設旗鼓為疑兵賊見遠軍遂退

蜀將姜維圍狄道魏將陳泰等進軍度高城嶺潛行夜
至狄道南西高山之上多舉烽火鳴鼓角城中見
救者至皆憤勇維謂救兵當須集衆而發乃率聞
救已至似有奇變宿謀倉忙引兵退去

兵無繼必敗

唐契丹李盡忠孫萬榮叛有詔王孝傑起白衣為清邊

總管統兵十八萬討之孝傑軍至于峽石谷遇賊道險虜甚衆孝傑以精卒銳士為先鋒且戰且行及出谷布方陣以捍賊後軍總管蘇定暉畏賊衆棄甲而遁孝傑既無有後繼為賊所乘營中潰亂孝傑墮谷而死兵士被殺殆盡時張說為節度管書記馳奏其事則天問孝傑敗亡之狀說曰孝傑忠勇敢死深入賊境以少禦衆但為後援不至所以致敗

兵多宜分軍相繼

東魏大將軍高歡大舉以伐西魏將渡蒲津其將薛琚
曰西賊連年饑饉但以分兵諸道勿與野戰比及
來年夏秋人多盡應飢死西賊自然歸降願無渡
河也侯景亦曰今者兵衆極大萬一不捷卒難收
斂不如分為二軍相繼而進前軍若勝後軍全力
前軍若敗後軍承之高歡皆弗聽遂有沙苑之敗

救兵

春秋時楚伍員與申包胥交子胥楚臣其亡也謂申包

胥曰我必復楚國

復報也

申包胥曰勉之子能復之

我必能興之及昭王在隨申包胥如秦乞師曰吳

為封豕長蛇以荐食上國

荐殺也言吳貪害如蛇豕

立依於庭

牆而哭日夜不絕聲勺飲不入口七日秦師乃出

申包胥以秦師至秦子蒲子虎帥車五百乘以救

楚

五百乘三萬七千五百人

子蒲曰吾未知吳道

道謂路也

使楚人

先與吳人戰而自稷會之大敗夫槩王於沂

稷沂皆楚

地名

力少分兵必敗

漢初黥布反渡淮擊楚發軍與戰徐僮間楚為三軍欲以相救為奇兵或說楚將曰布善用兵人素畏之且兵法自戰其地為散地今別為三軍彼敗吾一軍餘皆散走安能相救楚將不聽布破其一軍二軍散走遂西與高帝兵遇於蘄西大戰帝軍敗之後漢初漁陽太守彭寵反自將二萬餘人攻幽州刺史

朱浮於薊光武使將軍鄧隆救薊隆軍路南浮軍
雍奴遣吏部奏狀帝讀檄怒謂使者曰營相去百
里其勢豈得相及比若還北軍必敗矣寵果盛兵
臨河以拒隆又別發輕騎二千襲其後大敗之隆
軍去朱浮遠遂不能救引而去

吳漢討公孫述乃進軍攻廣都拔之光武戒漢曰成都
十餘萬衆不可輕也但堅據廣都待其來攻勿與
爭鋒若不敢來攻公轉營迫之俟其力疲可擊也

漢乃乘利遂自將步騎二萬進逼成都去城十里
阻江北為營作浮橋副將劉尚將軍萬餘人屯於
江南相去二十餘里帝聞大驚使責漢曰公既輕
敵使深入又與尚別營事有緩急不能相及賊若
出兵綴公而以大眾攻尚破尚公即破矣急引兵還
廣都詔書未到述果使其將李豐袁吉攻漢使別
將攻尚漢敗入壁豐圍之漢乃詔諸將勵之曰今
與劉漢二處受圍其禍難量欲潛師就尚於江南

并兵禦之若能同心一力人自為戰大功可立如其不然敗必無疑於是饗士秣馬閉營三日不出乃多立幡旗使煙火不絕夜銜枚引兵與尚合軍豐等不覺明日分兵拒水北自將攻河南漢悉兵迎戰自辰至晡遂大敗破之斬袁吉於是引還廣都留劉尚拒述帝報曰公還廣都甚得其宜述必不敢畧尚而擊公也若先攻尚公從廣都悉兵騎赴之破之必矣自漢與述戰於成都廣都之間八

戰八克

蜀先主引兵東下伐吳魏文帝聞脩立柵連營七百餘里謂羣臣曰備不曉兵權豈有七百里營可以拒敵者乎包原隰險阻而軍者為敵所擒此兵家之忌也緩急不相救一軍潰則衆心恐矣數日果聞備敗

梁將王僧辨討侯景與陳霸先會于白茅灣進剋姑熟次蔡洲景登石頭城望官軍之盛不悅密謂左右